



Tir Yimyim

www.tiryimyim.in

Regd. No. RNI. NAGAAO/ 2004 / 13113. Postal-NE/RN-717.

e-mail : tiryimyim@gmail.com

TAPAK 3 Yangia anidakangma : Tir Yimyim tir_yimyim

tir yimyim TAPAK 8



Ukraine aser West Asia nung yimjung atema India-i inyaksü

PSG-i Kylian Mbappe nem sen £55 million agütsüsü



VOL. XXII ISSUE NO. 17 (ADOK 17) DIMAPUR KÜPTOKNÜ (SATURDAY) MONGPUTENI (OCTOBER) 26, 2024 ₹ 5.00

Centre-i "Additional Compassionate Pension" agütsüsü

New Delhi, October 25, 2024

(Agencies): Department of Pension and Pensioners' Welfare (DoPPW)-i centre sorkar kübok arishi küm 80 ser tema pensioners nem pension benefit talila agütsüsü metetdaksüogo.

DoPPW ya Ministry of Personnel, Public Grievances, and Pensions kübok lir aser parnok "compassionate allowance" agütsüsü shiogo.

Arishi küm 80 nungi 85 tsüingda senior citizens nem basic pension/compassionate allowance 20% aser arishi küm 85 nungi 90 tsüingda nem 30% agütsüsü.

Maneni, arishi küm 90 nungi 95 tsüingda alir nem basic pension/compassionate allowance 40% aser 95 nungi 100 tsüingdapur nem 50% agütsüsü.

Arishi küm 100 aser temapur super seniors nembo basic pension/compassionate allowance 100% agütsüsü ta DoPPW-i metetdaksüogo.

"Tatishitsü agi August 20, 1942 nü asoba pensioner kati August 1, 2022 nungi basic pension indang 20% additional pension ama angutsü akok. August 1, 1942 nü asoba pensioner kati kasaji angutsü" ta DoPPW-i ashi.

Pensioner kati lateta aliba arishi ajungba ita mezüing anogo nungi additional pension mesüra compassionate allowance inyakyim tenzüksü ta parnokisa ashi.

DoPPW-isa pension disbursement nung shilem agiba departments aser banks ajaki iba osang prokshitsü tetuyuba agütsüogo.

Germany-i India nung 90,000 nem skilled labour visas agütsüsü

New Delhi, October 25, 2024

(Agencies): Germany-i kümshia India nung nem skilled labour visas aser work permits agüja aruba teimba akümba metetdaksüogo.

Germany-i iba mera agiba pelashishia agizüker aser iba ajanga Germany renlokba nung teyari tulu alitsü ta Prime Minister Narendra Modi-i ashi.

Hokolbarnü PM Modi-i Chancellor Olaf Scholz jaoka senden ka amen. Scholz-i tang agi tasembuba India semdangi arua lir.

Scholz'er sokrari kümshia skilled Indian workers 20,000 nem visas agüja aruba 90,000 akümsü lemtetogo, ta PM Modi-

i osangbener dang ashi.

2022 nung India aser Germany tsüingda migration agreement ka nung sign sütep aser iba ya mapa inyakerterem aser kaketshirtem asoshi liasü.

Germany-isa visa application process tezübaba kümdaksütsü aser Germany nung Indian professional qualifications ajitetba inyakyim tajungba akümsü nangzükogo.

Germany nung industries balala nung mapa tazüing lakh 5.7 tema lir ta German Economic Institute-i metetdaksüogo.

Iba visa policy tasenba ajanga bendangertem mapa tazüingtem nung anioksü mera ka agiba ama sayur.

Nagaland ajungalen lokti nübodoka merükmejuogo

Dimapur, October 25, 2024

(TYO): Nagaland state sorkari tuyuba ama October 25, 2024 nü district ajak nung lokti nübodoka merükmeju mapa inyakogo.

Hornbill Festival tenzüker taküm küm 25 ajungba benjungmong dak rangloker Cabinet senden ka nung iba lemtet agia liasü.

Tanü Dimapur nung District Administration, sorkar mapa inyakerterem, Dimapur Municipal Council (DMC), East Dimapur Town Council (EDTC), Dimapur Urban Council Chairmen Federation (DUCCF), colony & ward chairmen, village council, school & college kaketshirtem, NGOs aser CSOs aikati iba mapa nung shilem agia liasü.

Dimapur Deputy Commissioner Dr. Tinojongshi Chang-i Heads of Departments (HODs), DMC & EDTC councilors, colony chairmen, village council lennirtem, rejutem aser shishilembartem dang tsüingsang mejungaka iba mapa nung shilem agiba atema pelaba metetdaksü.

Tanü mapa inyakdang Additional Deputy Commissioner (NCS) Zakabo V. Rotokha-i East Dimapur Town Council, Chief Executive Officer Thungchanbemo Tungoe o Revenue Officer Vineikho Tetso nati DMC aser Yanthungbemo Kikon, SDO (C) o Litsenthung Kikon, EAC, Dimapur nati Dimapur Sadar ketdangsüa repranga liasü.

School Education ketdangsür aika dak akhümket mali kümogo



Kohima, October 25, 2024

(TYO): Department nung ketdangsürtemi 'dignity of service' bener arutsüla aser iba ajanga Nagaland nung education system ajunga melenshitetsü ta School Education and SCERT Advisor Kekhrielhoulie Yhome-i ashi.

Nagaland School Education Administrative Officers' Association (NSEAOA) indang 15 buba general conference nung Yhome-i iba tayongzükba agütsü.

"Nenoki department tenzüksüba nung temulung agütsüsü. Asen department nung staff aika dak akhümket mali kümogo anungji asenoki kija shia dangi akhümket bener arutsü atema inyaksüla. Department ketdangsürtemi kati ka angatetsüla" ta pai ashi.

Department nung administrative officers-i mapa shitak meinyakba ajanga ketdangsübaren kanga majung kümogo. Tanü directorate nung file ka agüja mapa inyaksübaji kangasa majung kümogo. Tanü asenok ajak longjemer inyaker aser asenoki ajaki shisatsü agütsüteper. Department ketdangsürtem rongnung rara anentsüla" ta Advisor Yhome-i ashi.

"District kar nung civil administration-i DEOs, SDEOs aser AEOs madak ketdangsütsü atema department-i executive decision ka agiogo kechiyong mapa tazüing aika lir" ta paisa ashi.

"Asenoki meilungi three tiers-DEO, SDEO aser AEOs yangertsüla kechiyong district

nung parnok ya tongtired lir" ta Yhome-isa ashi.

"Directorate nung inyaksangshi ajak melentsüla aser iba atema administrative officers-i amalitep alitsüla. State sorkari Nagaland Education Administrative Service tenzüker aser Nagaland Education Service kübok adentsü. Iba atema NSSB aser NPSC rejutemi mapa inyaker" ta pai metetdaksü.

"Asen tanurtem nem iba mapa tamajung magizükdaksütsüla. Asenok ajak külemi shisadanga tebenja inyakyim ya agientsü merangdi" ta Advisor Yhome-isa ayongzük.

"Nagaland education system yanglushitsü atema taküm school 100 jungnüa shibangtsü. Onoki school tem ya tajangzük aketba aser inyakyim shitak inyakkak kümdaksünür" ta pai ashi.

"Department-i taruba küm asem-pezü ka tsüingda school 450 shi shibangtsü saka higher secondary schools talila lapoktsü" ta Yhome-isa shisem.

"Education, school/education administrators indang wadang ya architects ama lir. Parnok ya maparen ketdangsüba dang masü saka kaketshirtem tamendakdak yangertsürtem lir" ta Commissioner & Secretary School Education, Kevileno Angami-isa ashi.

"Department nung administrative officers-i kanga junga lenitsüla aser telemteba shitak agitsüla. Nenoki inclusive school/office team work sobaliba tentetsüla aser mapang shia

inspections asüba den staff dak tenük yoktsüla" ta lai ashi.

"Elementary aser secondary schools mesüra higher secondary education nung education administrators ajanga shisaliok wadang yangluba nung tongti shilem agir" ta Kevileno-isa ashi.

"Department nung mapa inyaker telemsa aika lir saka teachers recruitment policy shitak maliba ajanga service regularization nung timtem ajurur" ta NSEAOA president aser Assistant Director School Education, N. Thungchio Shitire-isa ashi.

"Universalization of Elementary Education (2001-02) atema SSA aser Secondary Education (2009-10) atema RMSA amala maparen ajanga Teachers recruitment policies nung tetsükdaksü bentsür arur aser iba ajanga service management aser infrastructure providence nung timtem ajurur" ta Thungchio-isa ashi.

SSA aser RMSA ajanga 2011 küm nungi State Teacher sanctioned posts nung retirement aser promotion vacancies inyakyim anenadok, ta paisa ashi.

Department-i School Manual ka adoktsüla aser iba ajanga tesayurtem aser department len anitsü ta Thungchio-isa tebilemba ka lemsatetp.

Iba sentong nung KABA Associate Pastor Dr. Imutoshi Lemtur-i temoatsü meshia sarasadem aser SDEO & Vice President Y. Mughaho Zhimo-i anküp tepela o jembi.

GST ajanga Nagaland kanga ajangzükogo: TR Zeliang

Dimapur, October 25, 2024

(TYO): Goods and Services Tax (GST) mapa inyakba ajanga Nagaland kanga ajangzükogo aser tesüba dang nungi sales tax revenue kanga agi tajungba kümogo ta Deputy Chief Minister TR Zeliang-i ashi.

"GST ajanga India nung indirect taxation system nung temelenshi tulu bentsür aruogo. Nagaland-i Centre dang nungi Tax devolution aser post-devolution revenue deficit grants anguba ya tax nungi lir aser iba ajanga state ketdangsüba nung

teyari tulu angur" ta TR Zeliang-i ashi.

Hokolbarnü Niathu Resort nung GST Refresher Training cum Stakeholder's Meet 2024 nung pai iba onük jembi.

Iba sentong ya State Taxes department-i GST Network (GSTN), New Delhi den yaritepa ayongzük.

Tax ketdangsürtem nem training agütsüba den ano sendaktepa alirtemi GST maparen tali angatetsü aser iba sülen anidaktsü ayongzüktsü atema iba sentong agiogo.

Nagaland State Tax department-i Aadhaar based biometric authentication tenzüka atema tenüingsang agütsü. North Eastern state tem rongnung iba inyakyim tenzüker mezüingpur rongnung Nagaland dena lir aser iba ajanga fake registration noktanger, ta TR Zeliang-isa ashi.

"Nagaland sorkari GST system nung adentsüpur ajak anioksü meranger. Tax ketdangsürtem kanga kümdanga alitsüla aser tax administration shitak inyaksüla" ta paisa ashi.

Mkg District Bharat Scouts & Guides tenzüker küm 75 jungogo



Minister, R.D & SIRD, Metsubo Jamir-i Mokokchung District Bharat Scouts & Guides pur jubilee nüngtem yangluba nüngshilung lapoktsüdang tangokba noksa nung angur. Mokokchung, 25th Oct. 2024.

Mokokchung, Mongputeni/ Oct. 25 (TYO): Mokokchung District Bharat Scouts & Guides (MDBSG) tenzüker küm 75 ajungba jubilee sentong ka October 25, 2024 nü yangi P. Shilu Ao Memorial Park, Mokokchung nung meraketa mungogo.

Iba sentong nung tongti tesemdanger Metsübo Jamir, Minister, RD & SIRD Govt. of Nagaland-i jembidang, Scouts & Guides ajanga tepela tajangshiba balala agütsüba den nisung ka dak mulunglemtet, tasütait, tejungnü aser ochishiba apuoktsür, itemji Scouts & Guides indang nükmen ka dangbo masü; itemji taküm nung sobotsü aser temulung nung azüita asen jakdang aliba

lenmang balala sayua anir, ta metetdaksü.

Nagaland Scouts & Guides maparen ya 1937 küm Kohima nung tenzük aser Mokokchung nung 1949 küm taoba Govt. High School Mokokchung principal, asür Mayangnokcha lensayuba kübok takutet asür Lolenokchaba lenisüba nung tenzüka aruba tanü küm 75 jubilee amunger, ta metetdaksü.

Scouts & Guides tentet ajanga alima nung lenla balala nung nüngtugu nisung aser lenir jenti adokdaksüogo; tatishitsü kar - Martin Luther King Jr, John F Kennedy, Bill Clinton, Barack Obama, Sir David Attenborough, Steven Spielberg, Sir Paul McCartney, Neil

Armstrong, Bear Grylls, Andy Murray, David Beckham, Venus Williams aser Taylor Swift ama aser Nagaland nungia taoba CM asür Jasokie, asür Samuel Mezur aser ano aika lir, ta pai ashi.

Paisa Scouts and Guides indang khuret kar lemsatepdang, khuret abenbaji asen lokti nung nai jangrabangraba ajanga tatishitsü tajung sayur, nai alima asoshi mapa tajung inyaksü tenangzükba agiogo, item tenangzükbatem inyaksü asoshi pei atema mebilemi nübur atema taküm bendanga agüja tenzüksü nungdaker aser ochi nungi majentsüla, ta pai ashi.

(Maneni tapak 8 nung...)

CRHSS Mokokchung silver jubilee among



Christian Residential Higher Secondary School, Mokokchung küm 25 ajungba Silver Jubilee benjung sentong nung Dr. Cynthia Walker USA tongti o jembir aser kaketshirtemi ken atandang tangokba noksa nung angur.

Mokokchung, Mongputeni/ Oct. 25 (TYO): Christian Residential Higher Secondary School (CRHSS) Mokokchung October 25 nü küm 25 ajungba Silver Jubilee benjung "Proclaiming the year of the Lord's Favour" Luke 4:19 omen nung ajemdaker mongogo.

Jubilee omen dak ajemdaker Dr. Cynthia Walker USA ajanga jembidang David chuba küm 37 asüdang temeshi ki ka asütsü tenzük aser pa arishi küm 70 tashi pai iba temekiji tajungtiba nung renemteta Tsüngrem tushitsü inyak aser iba mapang pai nüburtem shisatsü aser teyaria agi aser ibaji ajanga Tsüngrem setsüwangshidaksü.

Yamaji iba school Tsüngremer tetuyuba nung tenzük dang school noktaktettsü asoshi USA, UK aser Sweeden nungi teyari agütsüogo, aji oda süaka ano yangi aliba nüburtemi nungita yaritepba ajanga iba CRHSS ya takok nung noktaka lir ta ashi.

Tongti o jembirisa küm 25 tashi nung iba school nungi kaketshir tajung aika adokteter alitsüta amanger, ano maneni iba school ajanga lanurtem jenti aniteta alima yangluba nung shilem agitsü teimla tulu akarta ayongzüka jembir.

Sentong nung Tsüngrem lenisüba jazüka Rev.Martin Poole, UK ajanga sarasadem,

Jubilee Choir-i ken tajung ka aten, Dr.Sentila Ao, Principal Nagaland Bible College ajanga tarur pela agizükba o jembir; Tiala Ao, Co-founder, CRHSS; Artang Ward Chairman Ati Mongro; President, Board of School Management, CRHSS Mayang Ao; Geoff Naylor, UK; Arenlila Jamir, Alumni, CRHSS aser Jane, UK parnoki salem o jembir.

Jubilee nüngo kaket Wilma Naylor ajanga sayatsü aser Asso. Pastor Artang Baptist Arogo ajanga sarasadema sentong tembang. Iba jubilee sentong ya CRHSS nung tesayur Sunepienla Lkr lenisüba kübok agia liasü.

Dimapur nung State Level Science Drama Competition ali

Dimapur, Mongputeni/Oct. 25 (TYO): Annual (state level) Science Drama Competition (ASDC) sentong October 25, 2024 nü "Science & Technology for the Benefit of mankind" omen kübok Innovation Hub-Nagaland Science Centre, Dimapur nung agia liasü.

Nagaland ASDC-2024 ya PM SHRI Govt. High School Thahekhu ajanga akok, tanabuba jenjang Little Star Hr. Sec. School, Dimapur aser tasembuba jenjang Riverbelt School, Nagarjan, Dimapur ajanga ngua liasü.

Rincho Academy nungi Anitoka S Holo nem Best Actor sempet agütsü aser PM SHRI GHS Thahekhu nungi Mana S Sharma nem Best Actress sempet agüja liasü.

Kekhriesatuo Akashe Z Yhome nem Best Director aser Best Scrip Writer sempet agütsü.

Iba tetoktepba nung takok anguba school, PM SHRI GHS ya state tenüing nung Zonal Level - North-East Zone Science Deama Competition nung tokteptsü, koba November

14, 2024 nü National Science Centre, Guwahati nung agitsü lir.

Iba sentong ya Bendang Walling ya Chief Judge ama aden, shiba theatre practitioner aser film yanglur tejangja, National School of Drama, New Delhi nung Alumni aser Hill Theatre, Nagaland indang Artistic Director lir.

Science Drama Competition ya küm shia agiba sentong ka lir, koba lanurtem artistic sempet sayutsü aser socio-scientific inyakyim balala nung jilushi ya hadir ka ama amshitsü nükjiding lir.

Iba tetoktepba ya State Level nung tenzüker, iba sülen Regional Level alitsü aser tatemsa National Level, The National Science Drama Festival (NSDF) alitsü, koba National Council of Science Museums ajanga ayongzüker aser ketdang asür.

Nagaland ASDC ya Department of Science & Technology, Government of Nagaland ajanga sponsor süa ayongzüker.

ADC Mon ajanga lenmang nungi kisü-jensüba oset agentsü metetdaksü

Dimapur, Mongputeni/Oct. 25 (TYO): Home Department, Government of Nagaland ajanga totuyuba agütsüba nung ajemdaker Additional Deputy Commissioner, Mon, Pakon Phom, NCS ajanga Mon Town telungzük aser temeket lenmang nung kisü-jensüdang

amshiba osettsüset aser gari tem ajunga October 28, 2024 tashinung agentsü metetdaksü.

Iba totuyuba sülen manidaker nem ozüing agi melaba ama tapet temerenshi agütsütsü, ta sangdong ajanga ashi.

CAG office ajanga SMS & Web based IT semzükogo

Dimapur, Mongputeni/Oct. 25 (TYO): Office of the Comptroller & Auditor General of India sülen anidaka State Government mapa inyaker ajanzüksü atema SMS & Web based IT Project semzükogo, ta Office of the Principal Accountant General (A&E) Nagaland, Kohima ajanga State Government employees ajunga dang sangdong ka nung metetdaksü.

pensioner temi pension documents den mobile numbers agütsütsüla, ta ashi.

Iba IT Project ya SMS nung ajemdaka lir, koba ajanga Pension, GPF aser GE amala inyakyim sayur. SMS & Web based IT Project nükjiding ya Pension, GPF aser payslip/Leave/Leave encashment finalization nung ochishia registered mobile number dangi SMS yoktsü lir, ta ashi.

GPF atema subscribers nem pei indang GPF final payment case receipt aser finalization indang osang SMS ajanga agütsütsü. Iba SMS nungya website link aser khen atema User ID & Password agütsütsü (koba logging sür melentsüla) aser aji amshia digitally signed Personal copy of the GPF final payment authority download asütsü.

Pension atema mapa nungi anisüngzükba ketdangsür nem pension inyakyim nung osangtsüsang agütsütsü. SMS nungya website link aser khen atema User ID & Password agütsütsü (koba logging sür melentsüla) aser aji amshia digitally signed Personal copy of Pension authorities (PPO intimation slip, GPO, CPO) download asütsü.

GE atema Gazetted officers ajunga nem SMS ajanga osang agütsütsü, kong website link aser khen atema User ID & Password agütsütsü (koba logging sür melentsüla) aser aji amshia website nung temelaba agüja upload asüba sülen pei indang Pay slip/LAR/LARR/LER download sütettsü.

Iba facility agitsü atema Gazetted officers temi pei tenüing, designation & department tenüing dener mobile number agütsütsüla.

User ID & Password anguba sülen tamshir temi yangji shia aliba yimya nung pei indang Pension/GPF/GE authority download asütsüla, ta ashi.

Iba facility amshitsü atema

(Maneni tapak 8 nung...)



October 25, 2024 nü New Delhi nung Asia-Pacific Conference of German Business 2024 tetenzük sentong nung Ato kilonser, Narendra Modi, External Affairs Minister S Jaishankar aser Union Minister Piyush Goyal nung adenba noksa nung angur.

Ukraine aser West Asia nung yimjung atema India-i inyaksü: PM Modi

New Delhi, Mongputeni/October 25 (Agencies): Hokolbarnü Hyderabad House, New Delhi nung Ato kilonser Narendra Modi aser Germany Chancellor, Olaf Scholz na senden amenba mapang nung Ato kilonser Modi-i, India-i yimjung atema inyaksü, ta metetdaksü.

“Rara ajanga tebilemtsü balala kecha mebentetsü,” ta pai ashi.

Ukraine aser West Asia na nung tang teraradak tensa dak sendakba nung Ato kilonser Modi-i, “Tang Ukraine aser West Asia na nung rara ya anaprongla atema tebilemtsü onük ka lir. Rara ajanga tebilemtsü onük balala mebentetsü, ibaji India tangatetba lir. Yimjung atema India-i akokba tashi inyaksü melunga lir,” ta metetdaksü.

Kasa senden nungji lenir anati India aser Germany na tsungda defence aser security densema sector aika nung amalitepa inyakba jenjang tajungba akümtsü atema jemb.

“Tesendaktep tajungba akümba ya kati ka dak melung lemtetba temaitsü lir. Tanü Mutual Legal Assistance Treaty tezüngzüktep agiba maparen renemogo aser iba ya ajanga asenoki longjemer kiralongrar aser separatist anema raraba nung yaritsü,” ta Modi-i metetdaksü.

Germany Chancellor, Scholz-ia alima nung rara tamajungba akümba mapang ka nung India-i yimjung atema shilem tajung agiba lemsat.

“Talisa tang ama tensa ka nung South Asia tashi ita alitsü atema India ya kanga tongtibang. Russia-i Ukraine

amakba ajanga international ozüngtem benoktsü tali rongshir,” ta pai ashi. Lenir anatisa Indo-Pacific nunga amalitepa inyaksü atema jemb.

Chancellor Scholz den Germany nungi ketdangsertem agizükdang Modi-i, “Chancellor Scholz lenisüba kübok asen linük ana tsungda tesendaktep tajungba kümogo,” ta ashi.

Linük ana tsungda technology, skills development, innovation, artificial intelligence, semiconductors aser clean energy sectors nung amalitepa inyakba jenjang tajungba kümogo.

Chancellor Scholz-i, “Russia-i Ukraine anema raraba ajanga lenmang aisü nung Germany aser India nata takoksa angur. Teti atema yimjung alitsü asoshi India-i inyakbaji ni agizüker,” ta ashi.

India aser China sepaitem Demchok aser Depsang nungi aienshi tenzükogo

New Delhi, October 25 (Agencies): Anogo ishika tejaklen India aser China nati Line of Actual Control (LAC) tezüngzüktep agiba sülen Hokolbar nungi tenzüka India aser China sepaitem anüdoklen Ladakh nungi aienshi tenzükogo.

India aser China sepaitem anüdoklen Ladakh kübok Demchok aser Depsang Plains na nungi aienshi tenzükogo, ta India Defence ketdangsertemi metetdaksü.

India aser China nati Line of Actual Control nung patrolling tenzükshitsü atema tezüngzüktep agiba sülen point ana nungi sepaitem aienshir.

India nung sepaitema pei osettsüset bener peipei tesem nungi aienshi tenzükogo.

Hombarnü India-i, anüdoklen Ladakh kübok Line of Actual Control (LAC) nung patrolling dak sendakba nung China den tezüngzüktep agiogo, ta metetdakja liasü.

2020 küm June ita nung anüdoklen Ladakh kübok Galwan Valley nung India aser China sepaitem tsungda rara tulu adokba sülen nungi tenzüka kümpezü tashi linük ana tsungda tesendaktep kanga mejungi raksar liasü.

Hombarnü External Affairs Minister, S Jaishankar-i, akhi

ama India aser China sepaitemi asentenshir patrolling tenzüksü, ta metetdakja liasü.

China ketdangsertemibo Mongolbarnü Tir, Xi Jinping BRICS senden nung adentsü atema Russia-i apusoa aoba sülen ang iba osang metetdaksü.

Bodhbarnü Russia kübok Kazan yimi nung Ato kilonser Narendra Modi aser China Tir Xi Jinping na minute 50 shi senden amenba mapang nung tenatia India-China tsungda patrolling senzütsü aser Line of Actual Control (LAC) nungi aienshitsu tezüngzüktep agiba indang süoka jembigo.

Jammu & Kashmir nung kiralong-rartemi amakdang sepai ana asü

Srinagar, October 25 (Agencies): Brihostibar aonung Jammu & Kashmir nung sepaitem convoy ka Gulmarg army camp nungi Line of Control kübok Forward post-i aoba mapang nung kiralongrartemi convoy nung tesüsabuba gari ana amak.

Convoy garitem nungji JCO ka densema sepai 18 aser civilian kar liasü. Kiralongrartemi amakdang sepai ana den civilian ana asü aser sepai ana den civilian ka yiru.

Brihostibar aonung 7:00 ako meta Gulmarg nungi kilometer 15 shi pilar Botapathri nung aliba Nagin Post nung kiralongrartemi sepaitem convoy ji amak.

Iba tesem ya külen tsütsü Poonch lir aser külen tsütsü Pakistan Cobra Post anasa Line of Control (LoC) lir. Kiralongrartemji Poonch area nungi arua asütsüa akok mesüra Pakistan nungi arrtsü adena aitba asütsüa akok.

Iba tatalokba sülen sepaitemi arem nung kiralongrartemi mita odar.

Kashmir nung tesüba anogo 8 tsungda kiralongrartem tang agi pezübenbuba amaker. October 20 nü kiralongrartemi Z-Morh tunnel staff quarters amakdang staff tenet tepset.

October 18 nüa Shopian nung lisopur masüba nisung ka tepset aser October 24 nüa Pulwama nung lisopur masüba nisung ka yiru.

Brihostibarnü Raj Bhavan nung tongti ketdangsertem senden ka mena security tensa asadanga liasü. Iba senden nungji Jammu & Kashmir DGP, GOC of 15 Corps aser Kashmir nung aliba security aser intelligence tongti ketdangsertem aden.

LG, Manoj Sinha leniba nung amenba senden nungji security agency balala dang kiralongrartemi amakba nokdangtsü aser terenlok projects tekaraba nung inyaksü tuyua liasü.

LG-isa security sepaitem dang parnok tsungda amalitepa inyaksü aser kiralongrartem infrastructure raksatsütsü nükjidong nung inyaksü metetdakja liasü.



October 25, 2024 nü Mumbai nung Maharashtra Deputy Chief Minister aser NCP (Ajit) tongti, Ajit Pawar-i Zeeshan Siddique party nung agizükdang tangokba noksa nung angur. Maharashtra assembly election nung Siddique-i Bandra East constituency nungi tokteptsü.

Cyclone Dana lendong nung nisung ka süogo: Mamata Banerjee

New Delhi, October 25 (Agencies): Hokolbarnü West Bengal chief minister, Mamata Banerjee-i, Hokolbarnü Cyclone Dana ajanga state nung nisung ka süogo, ta metetdaksü.

Iba yipru mopung tesashi nungi jenbutsü atema sorkar ketdangsertemi kanga nemzüka aliba tesemtem nungi nisung lakh 2.16 aienshidaktsür liasü.

Kolkata nung osangbenertem den jembidang Mamata-i, “Iba tzü-mopung lendong nung nisung ka dang asü. Nisung ka par kidang cable dak sendakba mapa ka inyakba mapang nung asü. Postmortem examination report ajanga osang tejangja metettsü. Onoki (state sorkar) par kibong nem teyari agütsütsü,” ta metetdaksü.

Yipru mopung tensa mita alitsü asoshi la aonung piyong state secretariat nung liasü. “Iba cyclone ajanga district

karbo kanga mejungi kongshiogo, talisa azü ki aika raksatsüogo,” ta lai ashi.

IMD-i ashiba agi, Cyclone Dana north Odisha tzüyimkü atongba mapang nung mopungji ghonda ka nung kilometer 100-110 nungi kilometer 120 tashi kera aon.

Hokolbarnü IMD-i X ajanga, “Tanep 1:30 ako nungi 3:30 ako tashi nung Cyclonic yipru “Dana” north Odisha tzüyimkümlen Habalikhati Nature Camp (Bhitarikanika) aser Dhamara anasa süogo. Iba mapang nung mopungji ghonda ka nung kilometer 100-110 nungi kilometer 120 tashi kera aon,” ta metetdaksü.

“October 25 nü Odisha tzüyimkümlen aser south Gangetic West Bengal (east & west Medinipur) nung tzünglu sashia arutsü,” ta IMD-isa metetdakja liasü.



October 25, 2024 anepdang Cyclone ‘Dana’ süiba sülen West Bengal kübok Purba Medinipur district nung nisung kari lenmang merüktetba noksa nung angur.



TIR YIMYIM YIMOBILEM (EDITORIAL)

DIMAPUR KÜPTOKNÜ MONGPUTENI 26, 2024

Arogo Kaisar dangi aotsüla

Tanü asung asen lima government nung dang masü saka arogo aika nung o nung aser mapa nung oshimashi jembiba aser inyakba osang angashipet angashir. Iba jagi arogo nung er ajak mulung menener aser tanela nung tejangraba-tejangraba akümtsü melen terosepba-terosepba kümadoke. Aji oda, arogo kar nungbo Jubilee amungba otsü kakat dena mesayatetsüsa ataloker, arogo kar nung tambu tantsü rakteper, arogo kar lokti senden nungbo arogo senotsü osang magizüktetsüsa akümer, arogo kar nungbo senotsü samar aser arogo karbo kimonglumong indang tangar den ken o ashishiteptsüsa akümer. Item ajakji Tsüngremi moatsüba ser nung asenok tera mekümdangba aser menendakba agi timtem takoksa dang masü saka maksü dena ajurutsüsa akümba temenen mapatem lir. Atangji, government nungbo ochimashi mapatem inyakba anema bushisüngdangtsü aser merenshitsü atema temzüng ozüng aser inyakyim lateta lir. Iba jagi asenoki anogo shia asen lima nung CBI, ED aser Vigilance teloki government inyakyim nung dang masü saka business nung dena ochimashi inyakba tsütsü temulung melemi bilemba mapatem bushisüngdangba angashir aser angur. Ajisüaka, talisa asen lima nung arogo aser mungdang nung ochimashi inyakba mapatem yimjak nung jembiba, itemji bushisüngdanga aibelener dang merenshiba aser menokdaksübabo aibenbo mangashir. Ashiko, iba jagi balaka temulung ulur asütsü akok. Atangji, kadamasü kaji arogo nung sen chitsüba mesüra arogo nung li rakzüka mesüra arogo nung tiyazü jembiba anema arogoi tai adoktsüsa tasak aser madoktsüsa taksaba ta ratamata tulu nung asenok tamangertema memesük aser mamangertema masü ta tom nung asenok chidaka lir. Iba ama tensa nung asenok arogo nungertemi aiben arogo kodaser okadaki aotsü ta jembir. Ajisüaka, asenoki metetsüba kaji, alima nung okadak kümteta ayuba ya arogo nungertemi alima nung inyakba mapatem ya ochi asü shitak ta angadanger bendangtsütsü asoshi kümteta ayuba sabang ka lir. Aji oda, okadak ya Kaiser meyong obendangdak, idakji Kaiser yimli kübok alir tamanger aser mamangertem shirnok anemsa ken o bener arudir, item ken o ajakji angadanger bendangtsütsü. Aji oda, Mathi 22:21 nung " ajangla, kechi Kaisar meyong aji Kaisar nem agüjang aser kechi Tsüngrem meyong aji Tsüngrem nem agüjang," ta Yisui shia aliba ya sen dang masü saka ken o aser nebo dena lir ta asenoki angatetsü junger. Alima nung arogo nung ka tepseta yur kotak nung dang jembidi ta asenoki ashitsü asü ? Mesüra arogo nung kimonglumong ka kari rakzü nung, kecha masüar na agiang ta ashitsü asü ? Arogo nung inyakertemi arogo senpong azünga agitsür yutsür ao nung, kecka masüar odang tokjang ta asenoki ashitsü asü ? Masü, atangji, tanelabo kotak nung Tsüngremi bendangtsü saka alima nung ali tashi asenok taküm mapabo Kaisari bendangtsü. Aji oda, Kaisar obendangdakji temenen sabang amato bilema asenoki alima nung Kaisar dangi moura asenok Tsüngremi obendangdak matongdang asenok ajak ashir auer aser nisung tepseter kümer alitsü. Aji oda, tanü ama arogo nung ochimashi mapatem atalokdang Yisui Koisar dangi oang ta ashi ser nung asenoki moura asenok akoksatsü. Aji oda, yimten nung ochimashi mapatem inyakbabo tai, anungji merenshitsüla saka arogo nung ochimashi inyakbajibo kecha masü tai adoktsüla ta masü saka arogo nung ochishia shitak inyakbaji Tsüngrem nem agütsüdi aser ochimashi inyakba mapatemji Kaisar nem agütsüdi. Tanü putu tensa nung asenok arogo nung Court-i maotsü, FIR magütsütsü aser yimten nema magütsütsü ta asübaji temenen miimbanga yudi ta ashiba den kasa lir. Yisua, Peter, Yohan aser Pual-ia Pilate aser Kaisar court-i maotsü aser menokdaksü ta mashi. Item obendangdakjang Tsüngremi sentong atalok. Aji oda, government meyong, private meyong aser yabo arogo meyong ta mali, ochimashi mapaji kasa ochimashi mapa, ajak atema maksü aser takoksa, anungji ajak atema ozünga aser temerenshia kasasa angutsüsa Kaisar meyo.ngji Kaisar nemsä bendangdaksütsüla. Iba jagiang asenok tajungba küma melenshitsü aser Tsüngrem meyong shilem shitak Tsüngrem nem agütsütsü.

OLEMSABANG

Nutsüng teimbai mulungba ajakbo shitak masütsü akok

L. Kika Pongener.

Tanü asen lima nung lokti-tentet ajak 'Democracy' ya yim nung anir. Anungji telok tuluba/nütsüng teimbai mulungba nung ken o ajak lemteter. Aji oda, telok tuluba/nutsüng teimba (Majority)-i mulungbaji dang shitak/ochi amai züngshir aser telok tilaba/nutsüng ishiba (Minority)-i mulungbajibo meshitak aser ochi masü amai bilemer. Ajisüaka, ashiko, mapang kar nungpo telok tuluba/nütsüng teimbai mulungbaji ajakbo shitak masütsü akok. Mapang kar nungbo telok tilaba/nutsüng ishiba angatetba-jiang shitak/ochi asüba-a ajurur. Ano tanü putu nung lokti kar nungpo nütsüng-nübur tangateter teimba ka süpokrem agi tebang nembangtsür, mesüra lennir tongtipang aika süpokrem agi tebang nembangtsür ken o ochi/shitak nung mesüi telemtetba agitsü akok.... Atangji, shitakba/ochiba-to paitoker meshidakba-ang shitak kümdaktsür telemtetba agitsü akok mesüra obendang agütsütsü akok. Yongji, lokti nung nutsüng teimbai mulungba nung telemtetba agiba-a, ashiko, mapang ajak nungpo shitak masütsü akok. Anungji lokti nung kechi ken o telemtetba agidir agi-aka, akok tashi mapang agia kanga junga shisadanga, tatsü-talang ajak asadanga jembir külenang tatempang telemtetba agitsüla.

Tanü putu nung lokti aika nung kanga junga mebilemdangi telemtetba agia-adoker.... Saka maparen aika inyaka aodang timtem tetsükdaktsü ajurur. Anungji kechi ken o telemtetba agidir, nütsüng teimba kisung dak rangloker masü, akokba tashi kinük ajaklen asadanga, nisung tsüngdang temeden angutsüba nükjidong nung masü, telok tuluba peladaktsütsüba atema masü, saka Tsüngrem tsüngdang temeden angutsüsa....Tsüngremi mulongba asütsü asü masütsü (?) ta bilemdanga telemtetba ajak agitsüla. Lokti senden nung ken o telemtetba agidang ketdangpurtemi nuburtem nem akok tashi pei tebilemba lemsatapa jembitsü mapang peria lapoktsütsüla. Aji oda, lokti nung ken o telemtetba agidang nubur nem mapang peria melapoktsüi tashiyim agi ajepbanger telemtetba agitsü merangra.... Khen-bo takok angur ama asütsü....Saka "Longben tera ajemokba tzü nung metena-metena taküm küma metentetba" amai asütsü. Atangji, iba ken o-ji tatempang kati maruteti, "Sorak-lang nung attsü amai tanen maka ojen aotsü aser ibajagi nubur ajunga tekolak menudaktsütsü.

Akhi tejen putu nung anü-ita-petinu indang züngdanga takzürtem aikati alima ya tematsük (Flat) aser anu (Sun) yagi alima meküta alunger ta 'Theory' ka sayu. Anungji iba Theory nungji putu ishikabo anidaka aru. Saka Greek nung 'Shisara-jemer' Socrates-ibo alima ya telunglung (Round) aser anu (Sun)-ji marakzüi alir, saka alimai dang anuji meküta alunger....ta sayu. Ajisüaka, alimaji tematsük (Flat) ta sayurtemji teimba liasü. Aser Socrates pa kija dang asünung...Pai sayuba Theory-ji taia...ta tangar ajak jagi Socrates aitsü aser Socrates pa kija asünungji pa tai aküm. Ajisuaka, putu ishika süir külen, Socrates 'Theory'-ji dang shitak ta alimai meteta aküm aser tanü tashi iba nungji aor. Ibaji mesuka tanü putu nunga lokti nung ochi/shitakba-to tashiyim agi nembanga yutsütsü merangba-a khen-khenbo ajurur. Atangji, mapang kar nungpo lokti tilabai mulungba-jiang shitak/temeden asüba-a ajurur. Anungji lennir ajaki kanga shisa kaa lokti-ji anitsüla. Asen lenisüba mapang asen lokti nung ken o belutepa mepetmesu madokdaksütsüsa lenniri kanga shisa kaa anitsüla.

(Maneni asüng adok nung...)

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Nigeria nung Boko Haram teloki Khristan 4 tepsetba video ka saya



October 25, 2024: Khristan melungtet telok, Open Doors-i Nigeria nung kiralongrartemi Khristantem reshikangshiba osang mapang shia sangdonger.

Tawa Nigeria nung Islamic kiralongrar telok kati Khristan pezü tekolak tangzüka lepsetba video ka sayaba sülen linük nung Khristantem ano taliba tsübuteper, ta Open Doors-i metetdaksü.

Khristan pezü tekolak tangzüka lepsetertemji Islamic telok Boko Haram nung züngsemtem lir, ta bilemer. Parnoki Nigeria aser kidanger linüktem nung nisung meyrjang aika tepsetogo.

Boko Haram teloki sayaba minute 6 video nungji, kiralongrartem jagi Hausa oshi agi jembir. Kiralongrar rongnung kati, parnoki tepsettsü aliba

nisung pezü rongnungji kabo la teno tanutsüla lir, ta ashir.

“Onoki tanü tepsettsü aliba mamangertem (Khristantem) rongnung la densema lir. Tetsür aser tanurtem süaka shirnoki ozü yimsü (Islam) anema nokdakdir parnokia kasa tia ya ajurutsü,” ta kiralongrar jagisa metetdaksü.

“Koba tesem nungsa mamangertem lidir onoki parnok bushitsü aser tepsettsü,” ta pai ashi.

Iba sülen nisung parnoki nisung pezüji tekolak tangzüka lepseter.

Nisung pezüji tawa Nigeria nung Borno state kübok Gwoza area nungi apuba liasü.

Open Doors partner kati, “Boko Haram kiralongrartemi mapang shia, parnoki mamangertem anema ‘jihad’

rara ayonger, ta ashir. Islam yimsü mamangertembo ajak ‘mamangertem’ ta parnoki züngshir,” ta metetdaksü.

“Parnoki tepsettsü atema bushiba ‘top list’ nungji Khristantem lir,” ta pai metetdaksü.

Nigeria sorkar ketdangsertemi rara ajanga jenshia alirtem jenoka aliba displacement camps ajak shibangtsüogo, aser ibaji ajanga joko nisungtem pei kidangi meyipa oa alitsüsa akümer, ta pai ashi.

“Pei kidangi meyipa odaktsürtem nem sorkari chiyungtsü mesüra senotsü teyari agütsür, ajisüaka Khristantemibo pei kidangi meyipa mouner, kechiyong parnoki kidangi tanaben aotsü tsübur. Pei kidangi meyipa aoer karbo kiralongrartemi amakba ajanga tanaben ki toktsür jenogo,” ta paisa metetdaksü.

Taküm küm tetenzüklen Open Doors nungi research agirtemi northern Nigeria semdanga liasü. Kiralongrar telok balalai yimtsüngtem nung Khristantem amakba ajanga Khristantem aika jenshir, aser sorkar ketdangsertemi ozüng alema inyakertemji menokdangteter, ta Open Doors-i bushiteta liasü.

Tang alima nung Khristantem alitsü linük tamajungtiba 50 rongnung Nigeria ya jenjang 6buba nung lir (Open Doors World Watch List 2024).

ANO GO ABEN TSÜNGREM DEN

Taidok angutsü taidok agüjang

Aser ozüi kechi koda pi dang tai doka lir, aji oda ozü taia tokangma. Mathi 6:12

Mapa kar taidok agütsüba dang nungi agizüktsüba tali senti lir. Asen menen khuret bener külen aseni tai inyakba ajak nungi nüji kümdaktsübaji tesüngmangtsü ka lir. Yisui nütsüngtem dang parnoki sarasademba shia tai tokang ta sarasademang ta sayu. Asenoki anogo shia Tsüngrem anema inyaker ta Yisui metet. Asenoki Tsüngremi aginüba jenjang matonger. Anogo kata Tsüngrem dang tatok memeshi-i süidaktsütsü makok.

Asenoki asen anema inyaker dang tatok agütsüra, Tsüngremia asenok nem tatok agütsütsü kechiaser asenoki koda tangar dang tai atoker Tsüngremi yamaji asenok dang atoktsü ta Yisui tekümdangtsü agütsü (Matt. 6:15). Tsüngrem yimyaji tatok agutsutsuba lir (Anitet 34:6-7). Asenoki Pa nütsüngtem sünera, asenoki Pa tatishitsü nung anidaktsüla. Teti asen tsükchir dang Tsüngremi tatok agütsüra, asenoki tilaba kecha inyaktsü makok. Mapa kar nungbo tatok magütsütsüla ta Yisui mashi. Tatok magütsütsü Laishiba nung shia mali.

Nai kar nembo tatok magütsütsü mulungtetra ne tekülem aser sarasadem amajok (Matt. 5:23-24). Ne mulungjangi item tamangtem bushitettsü Tsüngrem dang asüngdangang. Nai taidok nüngdak bushidang tangar aibelenji mesüka alitsü Tsüngrem dang asüngdangang, idangji nai rishikangshir asoshi "Oba, parnok dang tai tokang" ta sarasademtsü.

Telok 17-i Commonwealth of Nations nungi Pakistan agientsü akhanger



Lahore, October 25 (Agencies): Pakistan nung Tsüngrem mezüngmeshiba ozüngtem nung ajemdaker Khristantem densema minorities anema inyakba aser meimchir temeden balala anema inyakba atema meimchir temeden atema inyaker organization 17-i Commonwealth of Nations nungi Pakistan agientsü atema takhangba agütsür.

Ajisüaka Pakistan nung alirtemibo, Commonwealth of Nations nungi Pakistan agienadokra ibaji ajanga Khristantem densema minorities-i ano taliba timtem ajangshitsüa akok, ta bilemer.

October 21 nungi October

26 tashi Samoa nung Commonwealth Heads of Government Meeting agitsü lia organization 17 jagi Commonwealth Secretariat dangi yimjak nung shidi ka zülua metetdaksü.

Iba shidi nungji sign süa alirtem rongnung Human Rights Without Frontiers, Bitter Winter, European Association for the Defense of Minorities, Center for Studies on Freedom of Religion Belief and Conscience, European Federation for Freedom of Belief aser Jubilee Campaign densema lir.

Shidi nungji yamai shia lir, Pakistan nung Tsüngrem mezüngmeshiba ozüngtem kübok tiyazü nung tai tonglokja

nisungtem reshikangshir, tepseter mesüra ozüng alema pua ayur.

Parnokisa, item ya Commonwealth Charter tangatetbatem anema lir, kechiyong iba Charter ajanga senso ajak nem democracy aser meimchir temeden agütsüba den külemi ajak kasa züngshitsü lateta lir, ta metetdaksü.

Pakistan nung Tsüngrem mezüngmeshiba ozüng kübok nisung aika nem tai tongloktsüogo aser parnok rongnung nisung 85 bo court nung ken o mangadangyongi lokti tepset.

Human Rights Without Frontiers nung Director, Willy Fautré-i, “Pakistan sorkari tim teinyaktsü meinyakba aser Commonwealth tangatetbatem anema aliba ozüngtem yanglushitsü memelungba ajanga tai maket nisung aika süogo,” ta metetdaksü.

Organization 17 jagisa, Pakistan nung yimsüsüba aser meimchir temeden dak sendakba onüktem nung ajemdaker 1999 nungi 2004

küm tashi aser 2007 nungi 2008 küm tashi Pakistan Commonwealth nungi Pakistan anaben agienba metetdaksü.

Parnokisa, tang tensa nunga Pakistan anema kasa inyaktsü nüngdaker, kechiyong iba linük nung yimsü nung ajemdaker minorities reshikangshir, ta metetdaksü.

Alima linüktemi Pakistan nung Tsüngrem mezüngmeshiba ozüngtem aitsür aser sorkar dang item ozüng yanglushitsü akhanger, saka sorkari item ozüng yanglushitsü memelungba dang masü saka minorities kümzüktsü atema-a kecha meinyaker, ta metetdaksü.

Ajisüaka Pakistan nung meimchir temeden atema inyakertemibo, Commonwealth of Nations nungi Pakistan agienba ajanga linük nung meimchir temeden anema inyakba manentsü, saka Khristantem densema minorities-i ano taliba timtem ajangshitsü, ta ashir.

Minorities Alliance Pakistan (MAP) nung Chairman, Akmal

Bhatti-i, “Pakistan nung meimchir temeden jenjang kanga mejungi kümogo saka Pakistan anema inyakbaji ajanga minorities-i ano taliba timtem ang ajurutsü,” ta ashi.

Bhatti-isa, “Sorkari mita reprangba ajanga Pakistan nung Arogotem aser Khristan organization aikati bendanglen nungi senotsü teyari mangur,” ta ashi.

Catholic Arogo indang human rights advocacy nung executive director, Naeem Yousaf Gill-i, “Commonwealth of Nations nungi Pakistan züngsem agienba ajanga linük nung tsüngrem mezüngmeshiba ozüngtem menokdangtettsü aser minorities temeden anema inyakba menokdangtettsü,” ta ashi.

“Ajisüaka Pakistan sorkar dang linük nung minorities ajak ‘first-class citizens’ ama züngshitsü atema dang rongshitsüla. Minorities temeden anema inyakertem nem temerenshi agütsütsüla aser minorities ajak nem kasa temeden agütsütsüla,” ta ashi.

AO OSHI ANGAZÜKDAK: TANÜ ANGAZÜKTSÜBA OJANG



Tapayutsü

(adj) taginütsüka, temeimtsü (lovely, desirable)

* Tanü asüing tapayutsü lanur aika taküm raksaa aoer.

Tapet

(adj) putepa, azüazüa (matching)

* Moalai süpeti den tapet sü tajung ka aben.

OLONG PAITEP # 6962

Grid for crossword puzzle #6962 with numbers 1-17.

TIPILEN :

- 1. Kecha tepila mali - 4
3. Alu junga maru - 6
5. Tesasa - 9
8. Paitep - 5
9. Temulung alem - 5
10. Tartsü - 5
12. Talaktsüka asateper - 5
15. Kaketshir - 9
16. Sunga asep - 6
17. Sentsü anü - 4

LANGTSÜNGLEN :

- 2. Süng teküp saktok - 5
3. Yangkhu nung enok - 4
4. Mongpu ka - 8
6. Aonung tesangwa - 3
7. Mapa meinyaknü - 8
11. Teret meyipangba - 3
14. Tsük satet - 4

OLONG PAITEP # 6961 TELANGZÜBA

TIPILEN :

- 1. Tanga, 6. Wara, 7. Rajang,
9. Anük, 10. Jenjang, 11. Alar,
14. Ngashi, 15. Nala, 16. Mechi.

LANGTSÜNGLEN :


- 2. Anga, 3. Yabang, 4. Tarok,
5. Orak, 8. Ainer, 9. Anema,
10. Jabili, 11. Among, 12. Miim,
13. Anem.

NAI-A YA METETTER MA



Ukraine tsür Yaroslava Mahuchikh-i world high jump record yangluogo. Taküm July ita Paris nung lai 2.10m record yangluteta liasü aser iba ya World Athletics-i kuli agütsüogo. July 7, 2024 nü Wanda Diamond League nung shilem ka Meeting de Paris nung Yaroslava Mahuchikh-i iba otsü tasen yangluteta liasü.

Rs 2,300-crore tim mesüi amshiba bushisüngdangtsü akhanger



Shillong, October 25, 2024 (Agencies): Meghalaya nung Voice of the People Party (VPP)-i Shillong-Nongstoin-Tura road project nung Rs 2,300-crore tim mesüi amshiba aitsüogo. "Iba inyakyim ya kanga tulu aser public sen tim mesüi amshiogo. Contractor temi mapa shitak inyaktsüla" ta VPP lennir aser Shillong MP Ricky Andrew J Syngkon-i ashi. Iba mapatong ya 2010 küm Centre sorkar indang Special

Road Development Programme- North East kübok mulunga agizüka liasü. Mezüingbo iba mapatong atema Rs 1,303.83 crore endoktsü ta ashi saka aiben reprangshiba sülen Rs 2,366.77 crore aküm. Iba mapatong ya 2014 küm tembangtsü mapang lateta liasü aser FIR nung state engineers aser Telangana o Haryana nung private company nungi ketdangsurtem dena nisung 9 dak tai tonglokja lir.

MP Syngkon-isa ozüing alema nakmati atuba aser centre sorkar den nakmati mapa inyakba atema mapa inyaktsü ayongzükogo. Iba inyakyim ajanga lipoküm nung timtem bentsür arur aser Meghalaya nem senotsü takoksa agütsür ta pai ashi. Meghalaya High Court-i tesüiba nung state sorkari ozüing alema nakmati atuba nung shilem agir ta ashiba den kasa VPP lennir aser MP Syngkon-ia metetdaksüogo.

Assam sorkari Diwali 2024 matongdang itasen agütsütsü

Guwahati, October 25, 2024 (Agencies): October 28, 2024 nungi state sorkar mapa inyakertem itasen agütsütsü ta Assam Chief Minister Himanta Sarma-i metetdaksü. Sorkar staff atema Diwali ya

benjung balaka südaktsütsü atema iba mapa inyaker. Iba lemtet ajanga sorkar mapa inyakertem senotsü tsütsü anisüngzük angutsü aser jelia benjung atema renemtsü akok. State sorkar mapa

inyakertemi iba lemtet pelashishia agizükogo aser sorkari kanga shisa kaa inyakogo ta ashir. Diwali dang "Festival of Lights" ta ajar aser India nung benjung tongtiba rongnung ka lir.

CBI-i Guwahati nung CGST Joint Commissioner ka apu

Guwahati, October 25, 2024 (Agencies): Central Bureau of Investigation (CBI)-i Hokolbarnü Assam nung Central Goods and Services Tax (CGST) Joint Commissioner Rahul Kumar puogo. Kumar ya Dibrugarh nung mapa lemsüka lir aser Guwahati nung special assignment ka inyakdang apu. Mumbai nung süpokrem ken o ka dak sendakba nung pa apu. Kumar-i Chartered Accountant (CA) ka ket nungi Rs 60 lakh süpokrem meshia agi aser iba senji company ka dang nungi meshiba liasü.

CBI-i CGST Superintendent, Sachin Gokulka apuba sülen Kumar puogo. Gokulka'er consultant kati pa tenüing nung süpokrem meshia liasü. Iba ken o dak sendakba nung consultant, CA aser GST superintendents 3 tashi puogo. Parnoki mezüingbo Rs 80 lakh süpokrem meshi saka tatem nung Rs 60 lakh agütsütsü mulungtep. Kumar ya CBI court, Guwahati-i anir oa ken o benoktsü. CGST ketdangsurtemi süpokrem sen mezüing shilem anguba sülen shishilembar chiok saka kasa anogo nungsa pa dang

tanüingba Rs 30 lakh meshi ta CBI-i bushisüngdangba nung putet. Shishilembar jagi CBI dangi ao aser parnok teyari agia CA nem Rs 20 lakh agütsü. Consultant Abhishek Mehta-i sen tabeni arudang pa CBI ketdangsurtemi apu aser pai Gokulka nem süpokrem sen agütsüba nangzük. Iba FIR nung IRS officer ana- Additional Commissioner Deepak Kumar Sharma aser Joint Commissioner Rahul Kumar na den CGST superintendents 3 dak tai tonglokja lir.



Arunachal Pradesh nung Brihostibarneep 2 buba International Tawang Marathon agiogo aser iba ya United Nations Day den külemi ayongzüka among. Iba sentong ya Arunachal Pradesh aser Indian Army ajanga külemi ayongzük aser tetsür 1,199 dena nisung ajak agi 4,580-i shilem agia liasü. Taküm International Tawang Marathon nung India kübok state 27 aser bendanger linük ana nungi nisungtemi shilem agia liasü. Taküm asemtepertem rongnung tambusangji Mumbai nungi arishi küm 80 tain ka liasü. Iba sentong nung Arunachal Pradesh Chief Minister Pema Khandu aser Gajraj Corps General Officer Commanding (GOC) Lieutenant General Gambhir Singh naprong aden aser shilem agi.

